

四庫全書

集部

欽定四庫全書

集部

藍山集卷四至六

詳校官庶吉士_臣朱理

中書_臣劉源溥覆勘

謄錄監生_臣汪本中

謄錄貢生_臣苗序濂

謄錄監生_臣徐元秀

欽定四庫全書

藍山集卷四

明 藍仁 撰

七言律詩

送太史子玄之忻城縣丞

慶遠忻城嶺海間，儒衣新授長民官。
哦松不可閒風月，棲棘何愁老鳳鸞。
夷獠雜居生自遂，包茅入貢政從寬。
惠連曾忝觀風使，畱得題詩到日看。

黃均德前任鄴都縣丞服闋赴京過余林下

三仕為丞不負人蜀中赤子戀慈親先塋已許號松栢
宣室猶思問鬼神偶過草堂畱藥物又趨京國拂衣塵
承家黃霸能為郡他日應期畫錦新

追賦懷富順縣丞徐惟楫卷

為問徐卿自別離鳴絃暫佐蜀邦時關山迢遞疎音况
風雨淒涼屢夢思三峽泛舟清夜泊雙松當戶綠陰移
喬遷此日知何處江上逢梅寄一枝

和吳縣丞韻

西山爽氣喜朝看
堆案相仍政自寬
筆底烟波孤棹晚
堂中風月一琴寒
定應投版思佳菊
還念垂綸釣碧湍
野老力供常賦外
不因詩興豈相干

謝雲松寄惠青藤

仙藥驅風力最靈
九華山裏老藤青
三更花露調冰椀
一斗松醪倒石罍
博士傳方消痼疾
衰容涉世保餘齡
更煩大筆重題品
續入神農本草經

新詩妙藥兩難酬
令我平生宿疾瘳
弱足便堪扶杖起

金
卷四
閒情先想出門遊
邑中佳句爭傳誦
海上仙方費遠求
強欲追隨成二老
莫將天驥笑駘牛

西山脩竹已為軍兵所伐

朝來伐竹已千竿
始覺籬籬宇宙寬
照室丹光林外見
隔溪山色座中看
春秋豈信栽培易
風雨那愁出入難
鳳鳥不來龍已去
空山誰與報平安

次韻雲松西山春遊五首

西山今雨叩門時
似與浮丘有夙期
良會可無佳客在

長吟忽動故人思，未能參道同餐玉。
遠想清齋只茹芝，千歲蟠桃忘早熟。
一瓢春醞寄來遲。

道院閒眠客思清，泥途數里倦趨程。
春寒未退花全少，暖霽微銷鶻又鳴。
城邑交流汗濁迹，丘園總待發生情。
詩囊擬共連床語，猶愧衰年宿疾嬰。

摩挲老眼倦編蒲，雨過山窓兀坐孤。
松帶浮雲張翠蓋，草承殘照綴明珠。
鳥鳴轉覺林塘靜，花發方知節候殊。
張籍題詩工古淡，愛來同賦輞川圖。

城南竹院似丹丘風雨遙知客獨留
花暝洞門春寂寂茶分石鼎夜悠悠
蘇耽井近觀遺跡徐孺亭空悵舊遊
不待山靈嘲俗駕題詩翠壑共賡酬

欲遊方外老何堪惆悵西山舊石龕
竹逕無塵深幾許松花有會近重三
涼生夜枕烟霞潤飢憶晨厨笋蕨甘
偶讀君詩如在眼夢魂飛繞白雲菴

追懷天壺舊遊

天壺不似在人寰湧翠飛流面面寒
石徑似梯同鳥上

洞門無鎖有猿看何年瑤草尋金磳舊日仙桃捧玉盤
宴罷流霞分手後獨因詩興更憑欄

酬伯穎見訪

開門春日枉良朋扶病相迎愧未能採藥久知來北谷
種瓜猶識住東陵丹砂變化神仙術白帽風流隱逸稱
老我無由筋力健廬峯雲壑擬同登

次詹立之題石壺庵韻

故人招飲石壺山烟火蕭條畫景寒仙去或傳丹井在

樵歸未得局棋看
莓苔雨後沿荒壁
薇蕨春來饋滿盤
前代開基仍種植
空餘疎竹對塵欄

送徐仲圭回黃巖

詩書正氣有家傳
鄉邑皆稱孺子賢
千里趨庭秋似水
重闌戲綵日如年
天台鳳穴迎朝旭
九曲魚歌起暮煙
兩地平安報消息
燈花數夜照人眠

呈邵張二宰

從祀先儒起邵張
高門奕世擢賢良
列星並應郎官出

愛日相期化國長綵翮固非棲枳棘白頭重欲詠甘棠
觀風倘入閩闕境邑有絃歌野有桑

滿縣栽花爛漫紅竹園村巷也春風簡書幕靜追呼少
鼓角樓高結構雄三考九年嘉績在一堂二妙頌聲同
斯文相顧偏青眼更欲題詩寄老翁

挽張執中煉師

壺中辟穀住多年命盡人間亦可憐血濺豺狼空落日
丹成鷄犬自昇天蓬萊雲氣迷仙馭松桂秋陰覆藥田

不待遼東歸化鶴人民城郭總蕭然

挽陳伯升蕭慈谷二公化日同門有為鄰媪稱
觴不至故末語及之

二老長齋共白頭一朝相挹去西遊已傳換骨藏諸洞
又說飛神上十洲賣藥壺公今暫隱開花殷七久難留
疎狂却憶東方朔只戀蟠桃不自由

賡雲松陪祭翁墩先壟

三年不得詣先塋白髮斜陽渺渺情空讀蓼莪揮涕淚

又慙麥飯負清明風烟極目山林遠丘壑傷心草樹平
多感故人深厚意一尊同薦石泉清

送張啓宗分韻得雲巖朝爽

仙巖上有白雲浮爽氣朝來豁遠眸羣壑漸分初上日
兩峯高並欲凌秋英靈未用譏塵俗故老相期事釣遊
幕下簡書何日靜同歌瑤草望滄洲

送杜德基歸省

苦學憐君寂少年傳瓊况是隱君孫屏山仰止來千里

杜曲分流遡一原
奇字政須詢故學
力行無愧守空言
西風一夜歸心切
知有慈親獨倚門

送彥材居貞

二鄭才名世並傳
自成同氣亦家賢
石渠有待書重校
宣室遙知席欲前
對雪肯過安道里
臨風長望季鷹船
春光浩蕩青雲濶
目送雙鴻上九天

閩關西去度嵯峨
下有輕舟入浙河
春日山川開雨雪
舊時灘瀨減風波
玉堂蓮炬須分直
茅屋村醪許重過

臃腫自慚山下木老枝空幹倚巖阿

送朱孟舒

秋風送別出閩關老桂吹香拂馬鞍分教往年曾北上
司征此日又南還詞林已富三冬學雲路終期九萬搏
愧我無成頭白盡紫芝黃葉共空山

窮鄉漸老不趨時短褐飄蕭兩鬢絲秋色黃花聊寫興
陽春白雪愧來詩分釴潞水驚文采攜酒芝山訪武夷
不為送行徵一語巷南巷北未相知

送魏上修

建安多士起明經年少如君學行成春日慈烏勤返哺
秋風丹桂久遺榮暫因樂育棲鄰邑又應賢良赴上京
自古移忠須就孝天顏咫尺更陳情

送鄭居貞

十年三上乞閒居又說鳴騶向草廬堯代巢由終有託
漢廷嚴馬欲何如蒼生久待東山起素業能忘谷口鋤
復有長林新構在一堂風月五車書

送穆谷華

二十年前知姓名殊方未遂盡簪情偶逢幽徑詢衰病
自說公車召老成深谷良材須世用高空健翮起秋清
野人願比支離木祇向山林送此生

擬送蔣伯羽

不掃仙壇借隱居扁舟南下意何如十年藩府趨帷幄
千里山河倦尺書恠事只今看失馬前程未用歎枯魚
病軀不得臨岐別搔首東風柳影疎

送李孟和

天書海內起英髦肯許山林索價高一日聲名催宦達
十年踪跡類逋逃女憐擇對方諧卜兒擬應門未代勞
寵祿少酬勤苦志不知何處試牛刀

戊午自壽

野人扣戶餽青精自笑龍鍾老鶴形卦滿周天著再揲
觴浮流水酒微醒桑蓬又記逢初度松柏何煩祝遠齡
頗與榮公同此樂長歌金石振林垌

十月初五日夜柳城夢草堂

落葉殘燈卧柳城
長江遠海隔柴荆
久淹客路頭俱白
暫想雲山夢亦清
黃鶴紫芝空谷晚
寒梅疎竹小窗晴
覺來枕上芭蕉雨
猶似松風澗水聲

寄雲松昆仲

秋山搖落正堪悲
蒼狗浮雲事不知
閱世祇應貧可免
閉門真與病相宜
坐依東壁看書倦
行過南園散藥遲
筆硯重尋塵滿几
故人已訝久無詩

劉俊民鎮撫自京回趨會不及詩以寄意

聞道回轅宿武夷巾車晨出赴襟期平安已驗從龜吉
進退誰言履虎危水驛梅花題壁處山營柳色候門時
清談不肯畱今夕目送南雲有所思

送董德輿迎侍兼東三山諸友

花壓春城綵袖迴雲飛秋水錦帆開山中令尹憂官瘦
江上慈親望子來遠道不違甘旨願清朝未乏孝廉材
三山故舊煩詢問歲晚相思肯寄梅

寄彭穆之

鄉閭誰信合并難數月曾無一日歡
釀酒祇應謀自醉題詩未肯借人看
林間麋鹿全天性澗底松筠保歲寒
青眼白頭相望在閉門高興愧袁安

寄劉蘭雪

故人出處本隨緣近日清修擬學禪
愛子早承兵印重在家先許佛燈傳
長空澹澹雲俱盡清夜沈沈月正圓
我亦東林同社客灰心世事了殘年

寄雲松

早歲相知晚更親
別來并覺白頭新
浮雲世事凡千變
空谷生涯只一貧
古道相看松竹冷
巔崖共畏雪霜頻
題詩報與加餐飯
臘盡風光漸轉春

寄王叔善

十年前識王長史
驛舍題詩寄寂寥
南北風塵音信斷
東西岐路夢魂遙
雪霜已入詩人鬢
廣海長驅使者輅
驄馬清風誰不避
蠻中瘴癘一時消

寄陳景章

閒雲野水平生趣大帽寬衫未老身五畝受廬依舊俗
十年開選候何人詩名漸遠非長計酒興全疎且耐貧
欲扣柴門連疾阻好風良月憶相親

寄張雲松

谷口生涯已白頭量才揣分早知休春風茆屋初巢燕
曉日桃林未放牛兒擬力田承素志客來扶杖共清遊
南山芝草年年長更與相尋綺里儔

杜甫平生草堂興老我正爾經營間溪流淺似浣花水
秋色高並成都山愛客自須開竹迳故人誰肯訪柴關
吟邊卻憶張君子危坐皋比也未閒

寄張兼善

故人卜隱依山市野老遷居到石村濁酒近爲謀共醉
新詩未穩許同論南風吹笋初成竹前雨移松已引根
肯向草堂尋杜甫百年地僻有柴門

寄林信夫

一官江北佐鳴絃消息時因過客傳不信阮生悲失路
自甘陶令賦歸田榕窻茶熟烟棲屋荔浦帆歸月在船
憶昔過門慙二仲蒼蒼風景舊山川

寄葛仲溫

中年相識少相親逆旅來過不厭頻貴賤雖殊皆白髮
田園有處避紅塵玉壺且醉藍山月丹鼎須分葛井春
更約明年同釣石桃花溪上兩烏巾

寄余復嬰

幾年韜隱武夷山
肯向秋風換壯顏
賣藥偶從城裏過
圍碁誰伴橘中間
先天龜筮傳神妙
何日刀圭乞火還
不信塵埃空老大
溪頭已結屋三間

擬寄葉希武

八十猶傳不入城
南州耆舊傳應成
自歌白石時長短
誰信滄溟又淺清
縱目已隨春樹遠
離愁更與暮雲平
凡材蒲柳多先悴
常向山中說姓名

寄劉彥炳

九曲溪頭問草堂，名山不隱又還鄉。
畫船邀客湖光近，金刹題詩竹影涼。
帷幄十年心最苦，幅巾三選意何長。
不知聽罷山陽笛，淚向南雲落幾行。

寄陳景忠

三年不見一書來，況憶論文共舉杯。
藥籠素無醫國術，鹽車空絆濟時才。
只今館閣思耆舊，何用山林問草萊。
落日題詩勞悵望，南天萬里鴈空來。

寄陳德甫

三山府學訓導

攜手琅琊飲釀泉別來書札罷流傳三山海水連春樹
九曲仙巖隔暮烟風景不隨人事異老懷肯作冷灰然
何時烏石山邊屋重看題詩憶惠連

寄張孟方

三年不見張君子舊作書巢傍澗松常與白雲分主客
偶因明月想形容飯牛短褐歌深夜采藥長鑱度遠峯
聞道近移毛義檄掉頭深入萬山重

寄老泉

草堂閒殺老狂夫世上窮愁盡撥除壯志豈期遊汗漫
輕身今欲託玄虛市廛不入伴多病道侶相安可久居
攬結林泉清氣在不知詩興近何如

經杜清碧先生墓

皓首山林草大玄鶴書徵起又歸田一窩自得堯夫樂
三策誰知賈誼賢空有墓碑臨道路更無書屋貯風烟
後生仰止前修遠慨想昇平七十年

次韻答張簿

苦熱休嫌襌襪過欲詢為況近如何陶公蓮社當尋伴
杜老花谿許放歌正乏酒錢誰送與又添詩債費催科
蒼頭不識相觀善牢閉柴門畏客多

野人不識學為官終老荷衣分所安泉石儘堪供嘯傲
風塵猶喜出艱難獻酬有客同三爵麤糲期君共一餐
獨念故侯忘貴重笑談只作布韋看

次前韻餞張簿

莫訝城南一再過老懷無奈別離何承恩未及瓜時代

善政猶存麥秀歌此日功名揚舊德當年經術亞前科
賓鴻去盡青天遠獨立看雲慷慨多

行人欲發重盤桓一夜西風枕不安仕止可師賢聖在
天親休念別離難松荒先隴宜秋掃菊滿東籬飫夕餐
翹首雲中天萬里祇從南鴈候書看

三獻無瑕白髮疎春風到處善噓枯一杯又唱陽關曲
五柳還尋栗里圖秋思定隨鴻共遠老顏真與鶴同癯
兒童贏得歸舟快囊裏春衣典欲無

丙寅歲春送崇邑判簿劉宗文朝京

榮名鄉校起才賢
早向亨衢著祖鞭
梧樹秋清初到邑
桃花春暖又朝天
由來枳棘棲非久
暫佐絃歌化已傳
王賦足供民瘼盡
野人側耳聽喬遷

佐邑由來宰邑同
一從堂上咏南風
十年巖穴消沈外
百里人烟笑語中
問俗更思延野老
親賢頻欲適儒宮
仙舟忽報朝天去
歸日棠陰滿路濃

餞張判簿

擲下朝簪似野翁
放教白髮少惺鬆
十年朽索馳危坂
一日歸鞭指大同
今雨更催新折柳
故山應羨後凋松
月明還有相思夢
九曲漁舟款乃中

王事賢勞白髮新
承恩此日許為民
久操判筆初停手
還著儒衣卻稱身
惜別敬持杯酒餞
投閒暫卜草堂鄰
故園松菊催歸興
目送飛鴻北向秦

苦學由來遠大期
不知陵谷忽遷移
陶潛去就唯耽酒
江總平生酷愛詩
高擢桂枝如昨夢
暫棲枳棘已多時

覃思此日歸驂動萬里秋風兩鬢絲

出遊

病中三月不出戶暖日晴風始一遊處處鳥鳴催布穀
山山花發叫鉤輅幽人杖來相就野老壺觴起更留
童僕不知觀物意歸途催報夕陽收

酬答啟東明上人詩畫之惠

上人自是贊休徒風雨重逢世事殊竹寺每懷尊宿健
草堂能憶故人無三年艾起烟霞疾八法書存竹石圖

他日相思回首處白雲千丈一峯孤

永平王谷雲來武夷奉其師慈谷蕭先生仙蛻
以歸藍山拙者嘉其誼而贈之

遠尋遺蛻訪仙壇又舉空衣返故山猿鶴淒涼思舊社
鬼神呵護惜餘丹紫溪涼月迎歸路白塔晴雲送出關
山下居人瞻望處南天飛度劍光寒

足弱服勝駿丸懷仙牧老

杖藜扶路更蹒跚空想秋風過北山帶索榮公行自笑

看花鐫跛醉仍還欲填溝壑狂何益久辱泥塗出轉艱
仙老傳方能勝駿相期來往華嵩間

次韻張雲松

懷友軒前百尺梧每從清蔭共趨隅學詩到老終教拙
種藥扶衰自笑愚高入天風鴻避弋長鳴秋雨鶴將雛
甘同木石居貧賤肯信寒松作大夫

次趙聲遠韻

閒抱瑤琴入武夷名山不隱復何之五車舊富三冬學

一卷新題九曲詩雕鶚漸冲霄漢遠蜩蟬自送夕陽遲
君家清獻梅花在靜對高標有所思

次游德芳韻

兵戈已覺素心違潦倒山林兩布衣茅屋春深桑柘薄
石田歲晚稻梁微綠萼但用平生足白髮方知往事非
九曲月明春水碧夜深同坐釣魚磯

餞彥材居貞子玄仲管

四賢同起七閩中久望仙舟上北風水驛偶成三宿別

茅簷因得一尊同高歌激烈詞源湧古帖臨摹筆陣雄
他日瀛洲羣彥集題書報與白頭翁

居貞請題國學鄭某省觀回京諸卷

早歲宜充觀國賓故鄉長念倚門親白頭作夢持環在
滄海馳情戀闕頻祖帳又聞喧道路仙槎欲泛上星辰
徵詩餞遠慚衰老空向山林想古人

送康鍊師歸上方觀二首

華蓋峯前上方觀武夷洞口遠遊仙送君竹杖歸千里

寄我茅齋住兩年紫氣浮闌開雨雪白雲垂戶候林泉
老懷此別休惆悵更說崆峒壽幾千

道人別我江西去藜杖衝寒手自拈久憶故山風月好

又驚歸鬢雪霜添鄰翁遠候蒼精佩闕吏先知紫氣瞻

若過新城煩借問月間遺蛻在金蟾

汪月間先居西山數年後住金蟾峰

解化有識云三十年後
吾當重來相見故及之

贈薛鍊師

長生何處得真傳徑入名山住十年共說墨符能役鬼

又參丹訣擬升仙吹簫坐久雲生石鍊藥遲眠月滿天
我亦願遊方外者安期應笑早華顛

寄余復嬰鍊師

石鼓渡頭呼釣船幔亭峰下候真仙川原雪霽浮春色
樓閣林深鎖暮烟遊市懸壺凡幾日還山服藥又千年
月間舊隱金蟾跡擬借丹爐煮石泉

贈桃源孫牧菴

道士何年始種桃仙源深處不容舫一林曉色丹霞散

雙澗飛泉錦浪高，烟火自應塵世隔。
犁鋤還共野人勞，采花食實年年事。
住向名山幾伐毛。

贈虞道士

清修苦節學神仙，九轉功成別有傳。
傾蓋猶思山市語，畫圖遙寄草堂懸。
一天星斗斟明水，幾處風雷送有年。
擬過蒼峰看修竹，開門不惜煮春泉。

食梨有感

西園梨樹憶兒栽，梨熟征兒去未回。
適口自憐甘似蜜，

羈懷誰念冷於灰
爭攀漫引兒童喜
啄食頻看鳥雀來
此日思兒常繞樹
不堪風雨晚相催

次仲雨韻懷兄

松菊軒成罷唱酬
可懷非罪泣孤囚
一川烟雨原鷓晚
萬里秋風塞鴈愁
每念凱歌還絕域
能忘堂構在中丘
音書莫訝從來少
魂夢相尋獨未休

示兒三首

天怒寧論罪有無
荷戈萬里成成都
三聲自聽猿鳴慘

一片誰憐鴈影孤苦樂不同安悔吝死生長定省憂虞
老牛舐犢終存愛白髮蕭蕭淚眼枯

哀容渾欲不勝衣況復天涯有戍兒塞鴈傳書空在望
林鳥反哺動遐思諸孫梨栗頻相聒獨老桑榆久自知
春日一罇拚盡興阿咸傍看醉題詩

拋却耕鋤候縣門朝呼夕令競紛紛久知畫地皆為獄
漫道號天可扣閭入市於菟尋汎語鬪牀骸棘倚真聞
白頭咄咄書空罷慚愧龐公訓子孫

送牛自牧住武夷仙掌庵

牧子風流老更狂，武夷六曲築茅堂。
肯從龍虎來今雨，懶向羅浮問故鄉。
山月夜寒丹伏火，洞天秋闊劍浮光。
衰年總仗刀圭力，他日須傳肘後方。

牧子疎狂早學仙，武夷更欲住千年。
已從春雨修茅屋，便擬秋風買釣船。
仙酒肯分山客醉，神丹未許世人傳。
汪顛寂寞金公隱，尚想風流在眼前。

欽定四庫全書

藍山集卷五

明 藍仁 撰

七言律詩

謝彥昭作小像

開口臨風牙齒疎搔頭向日鬢毛枯
自知老醜成何物誰喚良工寫此圖
藜杖偶從蓮社客角巾遙迓草堂癯
一丘一壑從吾好試問仙人著得無

吳子仁氏有斑竹杖藏之數年矣文彩熒然堅

勁可愛近以贈仲溫葛先生葛公得之甚喜登
山臨水之興浩然不可遏也過余求詩為賦二

律

數尺長筇拄過肩雲痕雨點灑淋漓託根霜雪生吳會
借力風雷起葛陂石徑攜歸花滿地溪橋閒倚月明時
野人素有遊山癖欲問仙翁借一枝

前得修篁滴漚斑湘妃淚灑幾時乾蛟龍變化休臨水
虎豹文章本在山孤幹自憐高節邁虛心相倚暮年安

花邨酒熟邀皆去烏帽春風酩酊還

賦梅杖

剪得孤山最舊枝老年筋力賴扶持雪中拄去餘香在
月下携來瘦影隨生長冰霜憐硬骨摩挲苔蘚露蒼皮
仙人九節休相笑也欲看山入武夷

携得南枝拄白雲天寒時復出柴門交頭共倚春風力
到手還疑夜月痕禹廟星霜空自化葛陂雷雨未應存
老來只為尋詩苦踏雪明朝過遠邨

綠竹新栽節節方老年與爾共行藏遊山鹿豕休相訝
倚壁蛟龍恐欲翔不用虛心隨石轉自來直幹拂雲長
扶持莫問顛崖遠但愧微蹤久雪霜

伐竹為筇共我長不煩繩削自然方端形祇是生來少
直節誰憐老幹剛拄過蒼苔窺鳥跡踏殘黃葉出羊腸
此君盡力扶衰朽一日平安不可忘

病中

能得浮生幾日間桑榆夕景漸闌珊病魔可避寧浮海

詩債相尋且閉關
燈影背窓愁作伴
雨聲喧枕夢驚還
鹿車記得清溪路
稍待秋風更入山

西窓僵卧動逾旬
世事淒涼淚滿巾
老去已無兒可托
病來直與死為鄰
孤虛履運成何事
悔吝連秋為此身
抗節擬同松栢固
顛崖從爾雪霜頻

衰年卧病閉柴荆
有客相過問死生
隱几祇饒昏欲睡
杖藜非復跛能行
社中漫忝詩名共
方外虛思藥術成
寄語郡齋張博士
寂寥猶望故人情

無才祇欲苦吟詩
肝腎雕鏤氣久衰
白虎痛傳關節偏
烏蛇方送藥資遲
下床腓股堅於石
覽鏡頭顱白勝絲
多謝道人余復古
酒瓢新浸五加皮

病起偶成

春來春去總匆匆
九十光陰卧病中
緩步也愁平地險
加餐不與去年同
生憎野草侵人綠
可惜殘花過眼紅
昨日鄰童偶相值
不知何處一衰翁

次韻雲松病中見寄

謝病投閒素願酬廣文
羶冷脫官囚叩龜勿藥終為喜
枉札加餐不用愁更向畫圖評
水石偶題詩句寄林丘
西山風雨茅齋冷獨老如今萬事休

同雲松西山懷舊

藍田丘壑費攀緣因憶前遊一惘然
丹藥難徵勾漏令
虹橋去說武夷仙西風老鶴松間語
白石羣羊洞口眠
無分在山空有屋塵埃袞袞送流年

題六朝遺秀圖

登臨長憶鳳凰臺
六代興衰跡已灰
山色共知今日好
水聲如訴舊時哀
天低白日浮雲合
地勝黃金與土埋
王謝諸公吟不盡
風光留待後人來

石頭城下繫孤蓬
滿眼興亡六代宮
吳晉山川非舊國
宋齊陵墓但秋風
穢土不入諸天界
花月高歌永夜中
欲問漁翁渾不識
年年江上蓼花紅

次韻壽雲松

才名久滯廣文韁
甲子頻催絳縣年
共說稱觴華旦近

那知扶杖白雲邊道人酒熟應同醉坐客詩成忽遠傳
黃石赤松長不老從來山澤號癯仙

壽日醺壇有感

三天符籙授長生凡骨尤慚煉未輕方士久傳餐白石
野人相勸飯青精宮商縹緲仙歌遠樓閣玲瓏梵氣成
弱冠有聞今白首空山何處候方平

題鄭居貞長林書屋

萬松樓外問松樓下有長林百畝幽最念詩書先澤遠

頻傷兵燹故園秋梗楠自足充新構風月從知勝舊遊
挿架牙籤三萬軸諸孫文彩繼弓裘

自述

弱子承家志未酬無辜遽作楚人囚萊衣漫有思鄉淚
羌笛真成出塞愁白髮臨風悲遠道綠蓑耕雨憶荒丘
放農銷甲知何日更倚柴門望不休

哭兒骨殖還故山

愁心慘澹失清秋歸骨淒涼傍故丘總為無兒憐伯道

更堪非罪哭王裒從來禍福分
淫善誰謂忠良似寇讐
黥作辱兵寧餓死西風殘照淚交流

竄死遐荒萬里餘藤纏草束土侵膚
黃金竟為讒言鑠
白骨翻成待價沽形影自隨嗟獨老
肝腸分裂念諸孤
天高視聽無消息強欲招魂託楚巫

明時不得保天倫萬里投荒殞爾身
欲引殘魂歸故國
祇憑老僕勝周親瘴雲瀘水郵亭遠
絕域孤城鳥道頻
此日先塋容附託一抔黃土骨如銀

哭彭副使啟殯歸瑞安

獨振兵威百里間更推恩信數州安梟徒竟作操戈入
虎士翻成奉柩還大筆特書青史在荒祠遺像畫衣殘
銘旌遠道收凡骨一片歸雲度雁山

旅殯荒山三十春白頭執紼又何人久知杜甫須收骨
誰料張飛解殺身歸旄已隨春雨動故丘應與海雲鄰
武夷野老扶衰病楚些歌成淚滿巾

期雲松會宿不至

松軒會宿興難乘坐聽城頭轉二更北斗忽高當靜夜
南風不起又慳晴鼎中茶熟思清話囊裏詩成欲細評
相對白頭宜一笑百年幾度入山城

雨中會雲松無善宿西山

清宵那得酒如川共聽簷聲吼澗泉茅屋閉門慚舊隱
松窓下榻集羣賢茶甌款話更深後詩卷分題燭影前
歸思縱忙猶阻水竹床布被且同眠

梅村與雲壑會宿

清泉白石輒難忘又得春前會草堂對酒先拚今夕醉
題詩還倚少年狂山林寂寞形容老冰雪間關道路長
共愛雞鳴聽山雨後期何處更連床

雲松雲壑會宿翁源別後追賦

三日籃輿到處行雲深只訝野猿驚稍尋僧舍侵林影
偶聽樵歌出谷聲野老掃門霜葉滿山童淪茗石泉清
詩囊一夜談無厭共笑雞鳴夢不成

西山與雲松會宿

兩屐春泥懶過門一筇斜日會前村
烟霞夢想西山榻
風雨襟期北海尊
不俟主人趨竹所
休煩漁父入桃源
老年謬忝詩名共
莫惜燈前更細論

賦緋菊

丹砂竊服駐秋容
便與東籬景不同
徒有赭顏承雨露
苦無清節傲霜風
極知嫵媚隨人易
祇恐繁華過眼空
處士欲言何足辨
南山正落酒盃中

九月晦日見菊

一夜秋香未必衰
兩旬冷蕊苦開遲
非關獨立超流俗
自是孤芳不入時
歲暮結交松栢友
天寒謝絕蝶蜂知
無心更待陶潛酒
有感惟吟鄭谷詩

對菊

懶與時芳作並妍
西風籬落意蕭然
自從屈子歌騷後
也共陶潛到酒邊
消瘦只宜秋色好
耐交唯有晚香傳
南山長在幽人眼
開早開遲不必憐

催菊

籬下黃花共我長
開時便欲醉重陽
枝間點注分秋色
葉底胚胎釀晚香
久旱似慚虛雨露
後凋終擬傲風霜
兒童頗會吟翁意
朝夕分泉灌溉忙

賦劉俊民鎮撫蘭室

一室廬居不受喧
滿前生意對蘭孫
七絃漫倚宣尼操
九畹仍窺屈子園
霽月光風浮戶牖
清霜紫電繞轅門
十年來往慚交誼
襟袖餘香想契言

寄余鍊師居玉蟾丹室

湖海歸來挂一瓢，玉蟾丹竈待重燒。
內經黃帝留鍼訣，三品神農辨藥苗。
楓葉漁舟波澹澹，茶烟禪榻鬢蕭蕭。
高秋擬借峯頭鶴，共爾吹笙遡泖寥。

送蜜與蘭室

松花崖蜜古方傳，久服輕身更引年。
愛伴茶爐烹雪水，懶隨桂酒釀山泉。
清涵渴肺醒司馬，潤入枯腸笑玉川。
亦有小詩呈巨眼，煩將真味別中邊。

雲松邀往翁源足疾不果行

臨水登山興已非客來扶杖強相依前川不得隨花柳
遠壑空思老蕨薇覽鏡傍徨餘髮短開書涵泳壯心微
仙人不授輕身術安得凌空跨鶴飛

又簡汝實祐吉席上諸公

兩處芳筵共一朝病軀不動愧相招已知博士推名飲
又說監河善醉謠冠弁巍峩容自肅觥籌交錯興初饒
巷南巷北休辭遠絳蠟銅盤徹夜燒

寒食有感

纍纍丘墓掃西原寒食清明又一年好木青黃多自累
野花紅白更誰憐種桃適世今何處辟穀長生亦偶然
不待蒼龜推倚伏眼中海水換桑田

用韻自述

生年七十又週餘萬事從心不校渠風雨聲中長閉戶
桑榆影裏更觀書行扶竹杖龍鍾甚病踞藜床偃蹇如
憶昨武夷雲滿谷長松千樹託巢居

代靈寶廢觀道士葉宗善贊縣官

大理曾懸一黍珠六丁收拾入蓬壺問圖共記神仙境
官府堪徵郡邑圖梵氣何時重結構故基此日尚虛無
甘棠數畝春陰近借與西坡辟穀癯

次雲松留別韻

為客山中未浹旬分攜相顧白頭新長橋柳色霏微雨
空谷芝香浩蕩春君意自寬猶惜別我才無用付沉淪
林泉爽氣宜詩興應有新篇寄惠頻

次張判簿留別韻

素琴黃卷日相親不分名韁苦絆身萬里山河非舊國
十年江漢尚迷津海門又送孤舟雨輦路重趨兩袖塵
賀監乞歸天亦許鑑湖春水屬閒人

次韻雲松西山送別張兼善

西山一逕綠陰稠梅雨晴時送客遊對榻更期何夕再
抱琴深入白雲幽微風藥草薰衣袖盡日詩瓢挂杖頭
閒說道人猶惜別呼尊剪韭夜相留

執熱奉懷余復嬰

毒熱中人如毒藥流年過眼似流星已拚朽骨同蟬蛻
敢擬高仙類鶴形清論有聞勝濁酒非才自笑負丹經
山中舊屋何人住千載長松養茯苓

中秋對月

西風片雨過林塘對月還疑在故鄉灝氣平分清夜永
微雲不動碧天長持杯且共寒蟾醉擣藥何勞白兔忙
雲谷故人忘世者當年同見海生桑

題雪景

高閣臨江戶牖開兒童歡喜故人來不知天際孤帆到
祇訝山陰短棹回雪凍白魚初上釣天寒綠蟻自添杯
題詩正好分清氣回首瓊瑤萬壑堆

次韻雲松雪中二律

山中歲晚雪迷漫甕牖前頭失翠巒剪水應愁南浦淺
飛花亂逐北風寒明年已卜豐年瑞舊俗相傳瘴癘安
空向茅簷堆幾處老眸無復映書看

鶴髮閒披曳履行太虛素積自生明人間失却黃塵路

天上移來白玉京
老耽吟心獨苦袁安僵
卧夢還清
南村撥凍尋春色
折得梅花寄遠情

再次前韻

北風吹落雪漫漫
轉眼青山起素巒
平地已迷行逕險
閉門猶怯擁爐寒
池清有影驚梅重
夜永無聲喜竹安
憶向廬峯凌絕頂
下方俱作白雲看

僦得籃輿冒雪行
林巒相映月華明
應同棧道經西嶺
又似飛沙抵北京
擎重更看危木在
號寒偏聽野猿清

開窓淪茗題詩句誰與山翁共此情

雪中偶成

背郭茅堂早閉門天寒獨戀緼袍溫
琴書散漫無賓客稼穡艱難有子孫
竹杖稍能扶病力梅花強欲惱吟魂
寒驢踏雪如堪借行盡江南數里村

臘前三白報年豐里巷歡愉著處同
林野漸添飢鳥雀階除初積走兒童
梨花柳絮遮無地鷺羽鴻毛散滿空
也有灞橋清興在獨慚衰老句難工

春雪

大雪自來南地少
臘前春後苦寒生
江清已壓漁舟重
風逆還隨柳絮輕
萬里山川同一色
誰家烟火起初晴
春風欲解崑崙凍
願借黃河一洗兵

題王仲文監稅臨清閣卷

官閣臨清背市廛
司征餘暇思飄然
牛羊春雨回山徑
鷗鷺秋風傍釣船
酒熟重期何日會
詩成還有幾人傳
瓜時未欲忘清景
歸捧新圖鶴髮前

城隅官閣下臨河
監稅閒來載酒過
兩岸蟬聲喧濕翠
一天鷺影落晴波
凭欄自有幽人樂
趨市能無估客歌
三載政成心似水
栢臺還說薦書多

官閣新成勝槩兼
日長公暇理牙籤
青山對榻嵐光重
碧水當軒爽氣添
客到無時浮大白
人間何處有朱炎
遙知睡起題詩際
燕語隨風落畫簷

至梅村別業再用前韻寄雲壑

猿鶴相招隱此山
柴門一逕雪霜殘
已知富貴輸年少

自抱幽貞傲歲寒野老許携新釀至鄰人閒借舊書看
陽和欲候梅梢信數日攀躋未覺難

世情只益老年悲秋氣先從病骨知高卧且尋愚谷僻
曠懷唯入醉鄉宜田園著處征徭急風雨孤村穫歛遲
擬約道人雲壑外茶鐺煮瀑共談詩

詹齊之訪予章屯別業不值有詩留題次韻奉
答

一自琅邪返故林幾年種樹未成陰買山得屋纔容膝

愛竹臨軒自解襟
春雨桑麻連曉社
西風猿鶴共秋吟
忽聞張籍蓬門過
他日相期話此心

野人自愛住雲林
客到開門掃綠陰
白帽有情應送老
綠尊無事且開襟
一川野水春鉏下
四壁秋風蟋蟀吟
共作故園松菊主
未慚元亮百年心

題程芳遠遊方卷

程芳遠氏學楊而好儒者也
早年與故弟藍虛白為方外交
所至必禮宿師名儒以求講

益新朝取士無棄材芳遠乃以方外得免藍
澗弟在山時復與為泉石侶芳遠近以雲遊
卷求詩余喜芳遠之獨善又悲二弟之早逝
臨紙惘然

留形且作地行仙依止名山五十年雲水遠遊天下半
松筠高節歲寒全清吟近日窺風雅真訣先天講洞玄
吾弟論文多換骨還丹未許老夫傳

題西山庵

空山寂寂守巖扃，獨鶴栖栖傍草亭。
曉鏡又催霜雪白，秋衣不換芰荷青。
仙人住處多栽藥，野老來時或負苓。
同氣凋零衰朽在，百年光景似晨星。

題余復嬰寄惠南山別墅圖

道人放筆起崢嶸，一片南山割眼明。
秋老層崖黃葉遍，天清幽墅白雲生。
振衣便欲乘風去，採藥還隨入谷行。
投老相依猿鶴侶，共知溪上草堂成。

再題南山別墅

携家自愛鹿門耕避世何須谷口名黃菊正開扶短杖
白衣不至對空罌隔溪漁笛隨風細何處牛歌起月明
兄弟幾人今隻影空搔短髮媿餘生

次雲松題南山別墅韻

紅塵不入種花源白髮高居曝背軒耕鑿誰知當世事
桑麻時共老農言疎簾野水分三迳古木寒烟自一村
昨夜故人來叩戶安排詩句對清尊

催黃仲文寄南山別墅圖

一段南山畫不成
王維天趣與經營
水清盤石思垂釣
花落荒村見偶耕
青嶂白雲仙掌迴
淡烟疎雨輞川明
欲催下筆留真跡
先許題詩照有聲

上官仲敏惠書用其挽藍澗弟韻奉答

城南分手五經秋
肯信才名晚未收
濟濟青衿歌在泮
蕭蕭白髮倦登樓
山川寥落雲千里
骨肉淒涼草一丘
尚憶冷氍倚大樹
西風九日舊同遊

次韻答劉南山

秋風木葉下庭皋眼底南山突兀高倚馬成篇知獨步
屠龍挾技笑羣豪未應澗谷藏名迹終見雲霄起羽毛
偶辱新題驚老病依歌何敢近風騷

次韻答歐陽雪舟

雲出無心鶴自啼塵埃何用污人衣東將入海從巢父
西上長安愧陸機才薄真為時俗忌年衰猶恨弟兄稀
南窓一枕松風睡遮莫人間萬事非

百年舊隱傍名山一落塵埃竟不還自倚渭流難變濁

金
誰知獸食不留斑
松楸漸覺秋風老
澗壑惟餘夜月閒
慚愧老兄携弱姪
又修茆屋卧雲間

閉門仲蔚只村居
賣卜君平與世疎
兩地相思常命駕
十年不會費題書
青山久候幽人履
白屋曾留長者車
秋早黃花開較晚
度關紫氣近何如

次韻答劉用貞

傾蓋溪頭一再逢
六年相望寸心同
柴門跼雨題名去
竹檻看雲執手從
前輩文章觀酒德
後來歲月嘆詩窮

鹿車又與佳兒隱笑折梅花餞曉風

有賦凌雲嘆不逢山林出處調應同賓筵偶奉清尊集
鄰卷頻扶短杖從范叔解衣情未展袁安僵卧道非窮
春來擬聽絃歌處白帽低斜杏樹風

明時出處係遭逢投足山林長物同疏食每留佳客坐
緼袍自愛野人從開園橡栗羣狙喜滿屋詩書五鬼窮
猶有短琴隨白首興來一曲鼓松風

拜虛白塔

石逕松林入翠微
門人卜此窠空衣
流沙幾日青牛度
滄海千年白鶴歸
山鬼夜驚丹氣吐
洞雷晴挾劍光飛
久知生滅元無礙
目斷鴿原下夕暉

九日西山燕集次靖之韻追懷虛白高士

九日重登卧月臺
西風愁對菊花開
空聞玉女賓雲曲
不見銅仙白露杯
葛井丹成龍自化
楓江霜冷雁空哀
杜陵老去多詩興
不待尊前急雨催

挽蔣鶴田

乾坤慘淡士林空又折南山百丈松只有騎驢嗔李白
更無覆瓿笑揚雄清文金石傳來世高節田園託老農
他日漢廷興禮樂安車不復到閩中

憶過秋山訪隱居三年悵望信音疎共知鄰境征徭密
不念斯文老病餘易簣恨遲千里駕成家須護一樓書
門人藍澗修文早不及哀歌共挽車

挽牛自牧

皓首論交二十年西風吹淚一潸然鹿皮尚想山中隱

鶴骨元知海上仙
賓榻動隨長有酒
藥囊好施不留錢
門人應空空衣在
何處青山是墓田

小樓對雪有懷西山道人

西山白雪一丈深
北風吹倒長松林
千崖無人虎豹死
中夜有客烏鵲吟
高樓此時最相憶
弱水隔海知難尋
凡身毛骨更蕭爽
願借黃鶴樓雲岑

欽定四庫全書

藍山集卷六

明 藍仁 撰

五言絕句

墨梅

不必論清白猶懷度暗香無人知此意月色正昏黃

墨菊

晚節黃金盡霜枝淡墨新東籬日昏黑不見白衣人

題車老人墨竹

其子為
崇安簿

秋色映琅玕青青共歲寒過庭山月白留影易棲鸞

桃花雙雀

雙雀睡方濃桃花笑暖風休驚春夢斷長在綠雲中
花鳥最娛人良工筆更真雙棲無限思長占一枝春

題張兼善雲樹圖

平川開遠景倦客憶先廬數里閒雲在東風過雨初

題平川雲樹圖

窈窕川谷靜蒼茫雲樹深十年岐路者一片故園心

題樵隱圖

野橋橫澗淺茅屋傍林微
隱者無尋處春山伐木歸

題方方壺畫垂綸意

漁父空頭白生涯一舸微
欲浮滄海去又逐暮潮歸
雲樹遠重重川平夕有風
買魚呼不應船過釣臺東

六言詩

題青山白雲圖

茆屋何人共住石林似我曾遊
白雲只在半嶺青山誰

到上頭

題南山秋色

南山一片秋色老子半間白雲他日瓢中酒熟竹林風月平分

題湖山清隱圖

南山北山秋色東崦西崦人家倦客不歸頭白數年空負烟霞

七言絕句

題班姬扇面

花比容顏石比心
自將團扇寫新吟
同車昨日辭天寵
不用長門買賦金

題黃仲文扇面小景

鵲白新裁月一團
濛濛煙樹著前巒
野人不慣藏紈扇
片紙留傳久遠看

紙扇相遺意未輕
好風還似故人情
林中秋白休相笑
拾得長江片月明

山中隱者似王維
胸次丘園下筆時
何日南窗分一幅
輞川煙雨費題詩

題張師變小景

空山禿木兩株長
屈幹摺枝半欲僵
下有數榮三五樹
自緣低處少風霜

題黃仲文小景

雨過春山草木稠
懸崖千尺掛飛流
幽人倚杖遙觀處
似在廬山五老遊

春日觀泉

綠樹垂帷石作臺
龍唇拂拭自徘徊
黃埃赤石人間世
正想南風解愠來

清晝鼓琴

晴空萬里片雲收
山木蕭蕭虎豹秋
對酒願留天上月

清光長照少年頭

涼宵對月

旭日初升雪滿山水邊
林外覓花看南枝
先得陽和信
竹杖芒鞋不避寒

雪霽尋梅

題東郊歸牧圖

牛背相驅下隴時
夕陽門巷景遲遲
歌眠倒立休相訝

造化從來似小兒

淺石幽柯草滿川
吳牛背上穩於船
兒童顛倒爭喧笑
絕似雍熙在目前

題煙波垂釣扇面

漁釣生涯不為貧
煙波鷗鳥日相親
鑑湖一曲秋風興
誰似知章早乞身

題歐陽雪舟墨梅二首

橫梢倒幹春偏好
冷蘂疎花晚自妍
我老正須詩興助

欲移茅屋住湖邊

最憶廬陵老煉師
酒酣揮筆寫南枝
春風開盡江頭樹
不見扁舟載月時

題小幅雪景

短棹中流往復還
神交元不在承顏
剡溪清興何人會
月滿長川雪滿山

湖邊倒樹玉為槎
樹底茆簷路半斜
飢鶴翅寒飛不去
伴人閒立看梅花

玉堂空愧故人招
風雪歸來渡野橋
留得平生詩興在
寒驢破帽鬢蕭蕭

監關回首自淒涼
積雪層冰道路長
去國可無三宿戀
旁人休笑馬蹄僵

題孤松惟石圖

老枝枯幹倚巖巒
縱有風雲變化難
自是無心愛春色
千年留與石同看

題廉宣仲墨竹

先朝文物佳公子善寫蒼筤一兩枝不有百年真翰在
清風高節幾人知

城中無土種琅玕蒼翠時時畫裏看最憶西山秋影靜
滿身涼月更凭闌

黃仲文寄墨竹

一幅鶯谿寫輞川高情相許已三年春風傳得平安報
剪與淇園半畝煙

題宣和畫鵝雛卷

柳下金溝煖似湯羽翎全短毳毛長
審思不及鷹揚力
愛畫舟前似酒黃

宴安花木應成癖遊戲翎毛思有餘
內苑養雛何所賜
右軍能寫道家書

題獨駿圖

圉人牽出柳風涼十二天閑白晝長
老眼漸看兵草息
相逢期在華山陽

題王仲文臨清閣卷

高閣留賓酒滿杯
秋風千里雁初來
故園松竹平安在
天際歸舟不用催

題梅根讀易圖

疎花老幹轉春風
獨坐觀書夕照中
倘許蒼苔分半席
也來林下論叅同

題梅窗玩易圖

月到書帷夜肅然
南枝微有暗香傳
靜中紬繹先天學
消長盈虛在目前

又題梅窗玩易圖

三絕韋編一洗心
碧窗風露靜沉沉
寒灰自畫周天卦
月上梅梢夜已深

題清源玩易圖

一卷羲經足洗心
研硃滴露向秋林
仙人欲授參同論
白鶴飛來夜已深

效馮老泉詠西山蚊虫

林壑飢蚊響似雷
成羣作隊夜深來
道人傳得希夷睡

燒盡葭煙一束灰

蚊蟲只為口如針
火劫煙攻退又侵
風露儘多呼吸處
破窗殘隙莫相尋

散漫飄蕭豹脚長
小窗飛入鬧昏黃
月明蕙帳今空在
借問為誰逐客忙

霜落俱看掃跡空
雨餘又聽放聲同
生民膏血能多少
盡在饒腸利觜中

雲松到西山有四絕句見貽依韻奉和兼東雲

壑本淳一笑

自與山靈有宿期題詩屢報入山時林間二客煩相待
拂拭蒼苔看舊詩

路岐筋力久難堪偶為山人過水南明月軒中一斗酒
浮丘今夜共清談

三年兩夕會西山寸晷分陰若自慳白髮相期來洗髓
又扶竹杖叩雲關

平生痼疾在林泉老去詩名亦漫然故舊相逢聊一笑

蟬聲過耳竟誰傳

石村阻雪雲松息詩依韻奉答

清湖晴雪對蓮峯下有絃歌一畝宮
題得新詩寄茆屋
長松修竹共清風

攜得長鑱度雪峯月明畱宿洞仙宮
世人未識賓雲曲
閒却林梢一笛風

山行雨中

疎林野水白鷗閒細雨濃雲杳藹閒
若得扁舟載春酒

畫圖都是米家山

送茶與朱孟舒

仙草靈芽出洞天封題千里附歸鞭月明記得相尋處
曾試林間第一泉

病起後園看花四首

霜枝露葉長叢叢
鑄就黃金訝許同
昨日不緣行樂到
又成寂寞付秋風

冷坐東籬句自敲
旁人錯訝候香醪
餐英飲水尋真樂

久與王弘著絕交

露下碧叢珠滴滴月明素萼雪團團不知晚節全清白
更向東籬仔細看

一枝數萼剪輕冰應與淵明共素心秋色滿園題品徧
從來白玉貴黃金

東雲松會宿翁源

路入仙巖更向西松林茅屋擬同棲一尊風月謀今夕
邀得閒雲晚度溪

修渡船

渡口沉舟久欲修
百川東下正橫流
艱難共濟慚衰老
更喚前溪黃帽頭

秋日偶成

荒苔落葉小軒秋
兀坐無聊疾始瘳
一縷篆煙飛不盡
又將詩卷閱從頭

秋雨生寒似早春
寥寥門巷綠苔新
社前釀熟松醪酒
畱得仙瓢候故人

石村阻水

昨日今日雨不絕
武夷東西溪水高
駕壑仙船在巖頂
也愁孤擢動風濤

空山雨脚亂如麻
短杖衝泥草迳斜
野老門前三尺浪
相逢真在水仙家

聞小兒欲歸

風雨泥途汨汨忙
新春殘臘寄他鄉
歸期趁得天涯燕
社日飛來入草堂

除夜憶小兒泊峽口

除夜孤燈對短篷
浮生原不定西東
斷猿何處驚殘夢
風雨蕭蕭宿峽中

傷春

山莊寂寞雨兼風
紅紫園林數夕空
憶得往來三四十
青天白日萬方同

落花飛絮滿晴川
杜宇聲聲更可憐
不用傷心愁欲死
亦知春去有明年

食魚呈劉河泊

清溪紅鯉上雕盤
庖子揮刀鱠雪寒
遙想河官停夕飭
欲分山老助晨餐

琴高入海偶先還
掉尾揚鬐戲碧澗
野老久思羹一吸
病軀無力掣長竿

病來物物不入口
最想波鱗芼澗蔬
紫鯉上盤煮白雪
加餐願看腹中書

河官頓頓食魚羹
不待侯門有鉞聲
老子平生藜藿口

狂來猶欲膾長鯨

寄蘓明遠

寫得冰綃帶晚霞歸來卷贈一枝斜
摩挲老眼看春色卻訝牆頭出杏花

筆下秋光最好看相思千里寄來難
白頭已入廬山社猶憶東籬月影寒

稚子牽牛似挽車微風落日笛鳴鳴
故人久識柴門處為作監原野牧圖

釣船移向夕陽邊
春水桃花綠滿川
一曲漁歌聊自樂
晚風休為世人傳

寄復嬰本淳

絕粒虛腸譬餓囚
無眠低戶數更籌
仙家有說能飛解
不挾凡軀送十洲

桃花馬

君家駿騎自超羣
毛色桃花箇箇文
安得騰驤三萬匹
滿川應似漲紅雲

生從渥水真奇骨，卧向華陽亦素心。
何事落紅飛滿首，隨風衝雨過桃林。

病中

朽骨不禁風露冷，夜容更畏雪霜繁。
呼兒欲問春深淺，柳絮梨花已滿園。

杖策兒扶村舍翁，一樽花下卧春風。
社前雷動催茶笋，興入千巖萬壑中。

山城雨過草萋萋，無數殘紅逐馬蹄。
燕子不知春景異，

傍人華屋又銜泥

寄文明病中

童冠論交五十春
蒼南蒼北日相親
年來頗恨俱衰病
欲候平安却問人

欲療瘡痕未有方
閉門扶枕換年光
從來禍福分淫善
天道如何轉渺茫

贈雲壑

望山尋水不憚遙
白雲紅樹喜相招
夢回茅屋瀟瀟雨

又得留君住一宵

兼善攜仲文竹至

青山久隔故人面
脩竹自同君子心
老可近來無一事
為添清影滿東林

西山道人惠江南笋

江南苦竹生甘笋
春社雷驚出土長
扶病欲來參玉版
道人曉起贈雙筐

寄題五夫先壘

值親遠葬傍西巖麥飯來建每自慙願得太平徭役少
結不此地守松杉

先塋有感

雙親已遠弟兄稀
鬼夢相逢似舊時
茅屋數椽田二頃
白頭猶受一安遺

和雲松雪中十絕

夜寒敗歎臥如弓
起傍殘爐撥拙紅
童子偶看門外白
誰將瓊玖賤詩窮

夜雪才簷積漸高
傍林時聽折危梢
南山石上雙松樹
莫更動搖仙鶴巢

天上浮光帶玉京
世間幻境入瓊林
馮夷奪得天孫巧
剪水飛花一夜深

亂來雙鬢俱成雪
對雪疑窺鏡裏顏
明日春風消釋盡
祇留鬢影對青山

瓊林只在碧山阿
遙憶仙人寄傲多
閉戶衮安僂不起
難隨鶴背一相過

梅花開遍臘將殘幾度吟詩倚暮寒何處蹇驢馱孟老
一鞭風雪正漫漫

翠竹聲多春漸低寒梅封厚望應迷尋春擬趁朝暉出
又恐青鞋濕凍泥

曳履自慙隨獸迹背藜欲出聳鵞肩酒中挽得陽和轉
一斗松醪直萬錢

羣賢詩語鬪清新白戰何人筆有神未似漁翁堪入畫
孤舟蓑笠自垂綸

金少日人
卷六
旭日光微未盡消背陰巖谷沍連朝春風一解崑崙凍
漸化河漸入海潮

紙帳

數幅秋藤拂地齊匡牀閒對竹爐低山中一枕梅花月
不識雞聲送馬蹄

